

Betanços no mundo.

Pola recopilacióm,
Xosé-Maria Monterroso Devesa,
Membro da Associaçom Galega da Língua (AGAL).

Començamos esta exposicóm somera sobre um aspecto insólito e, portanto, curioso de Betanços. Ela discorrerá através da toponímia e a onomástica que Betanços originou.

NA TOPONÍMIA

Sabemos que a toponímia é o sistema que estuda os nomes dos lugares geográficos. E, pois que o lugar do que hoje tratamos é Betanços, caberia fazermos a análise da orige deste topónimo.

Mas nom é esta ocasióm, nem estamos capacitados para isso, quando nem os especialistas se puxerom de acordo sobre o particular. Apenas citaremos ao professor Moralejo Lasso (1), quem, á sua volta, cita a L. Monteagudo, segundo traduzimos:

"Para Betanços, que nom se remonta a Brigantium, inda que sejam un mesmo lugar, propuxo L. Monteagudo umha problemática base tirada de Habitancium, da Británia. (Ver Carta, em "Emérita", XXV, 1957, 62-63.)"

Ora bem. A raíz do descobrimento, conquista e colonizacóm das Américas pola Espanha, multitude de topónimos metropolitanos foram implantados no Novo Mundo. Uns, procedentes do terrunho natal dos descobridores; outros, como homenaxe aos diversos santos da Igreja Católica; outros, ainda, como tributo aos reis e príncipes do momento. Os mais subsistiram, os menos, nom.

Aí estám nomes desaparecidos de territórios como a ilha Juana (logo Cuba); aí estám os múltiples Santiagos ou o mesmo Sam Salvador (em homenaxe a tais santos); aí estám os Trujillos e Me-

dellins (em lembrança das vilas natais).

Mui posteriormente, já independentes as repúblicas latinoamericanas, foram nascendo outras entidades de povoacóm que evocaram homónimas da península. Esta volta o fenómeno deveu-se, normalmente, a ser tais localidades fundacóm de um ou vários colonos naturais das homónimas peninsulares. Assi aconteceu (1913) com o Orense de Buenos Aires, reflexo (castelhanizado, como o original) do Ourense natal dos seus primeiros povoadores (2).



América do Sul


Noutras ocasións, o nome da aldea, vila ou cidade refere-se ao próprio do mesmo povoador. Um exemplo caro a nós é, pese á sua modéstia, o da aldea uruguaia de Capilla de Farruco, originados localidade e nome na capela que ali erguera o galego Francisco Rodríguez (3).

A partir de um curioso trabalho de José Luis Gómez (4), junto a homonímias evidentemente casuais ou, melhor, aparentes ou accidentais, enteramo-nos da existéncia, além do oceano, de um Betanzos (com a ortografia castelhana que o topónimo-fonte também adoptou). Se, como dizemos, hai na relacóm dada para o planeta topónimos, como Puebla, que nada tenhem que ver com os homónimos galegos, no caso de Betanzos, tratando-se de um vocáculo tam singular, nom cabe dúvida que estamos perante un homónimo real e cabal.


Que orige tenhem este e o outro Betanzos americano que logo "descobrimos"? (5). Procedem de algum ou alguns betanceiros ali afincados, ou, simplesmente, provenhem de algum ou alguns individuos de apelido Betanzos? Em última instância, se assi for, temos que concordar em que tamén o apelido se originou na nossa cidade de Betanzos, e, daquela, esses topónimos americanos som, igualmente, reivindicáveis como de garela propria. Velosaí.

Betanzos, de Bolívia. Vila do centro-sul da república, no departamento de Potosí, mais ou menos equidistante de Paraguai, Argentina e Chile. Semelha, inda que humilde, ser o homónimo de Betanzos de maior relevância.


Betanzos, do Peru. Vila do departamento de Puno e província de Asángaro, nom



Betanzos-1



Betanzos-2



Betanzos-3



Betanzos-4

Heráldica do apelido Betanzos, según o padre Crespo

longe do lago Titicaca.

Restaria-nos citar um outro exemplo, único, da nossa própria Terra: o *Betanzos* (agora A Ponte de Betanzos), casal da parróquia de Bravos, no município lugués de Ourol.

E, por fim, terá relaçom algumha com a nossa velha capital umha *Ciénaga Betancí*, lamaçal situado na República de Colômbia, departamento de Bolívar?

NA ONOMÁSTICA

Já no ponto anterior tocamos algo o apelido Betanzos, como possível causante de algum dos Betanzos que nas Américas som.

Di-nos o genealogista Seijas (6) acerca de Betanzos:

"Apelido galego procedente da linage dos Andrade, pois que Diego Nunes de Andrade foi castelao da fortaleza de Betanzos e os seus descendentes adoptaram tal apelido, abandonando o de Andrade. O primeiro deles que o utilizou foi Goncalo Dias de Betanzos". "E engade: "Extenderom-se a Xaén e a Chile, a fins do século XVI", para logo passar a descrever as armas correspondentes.

Pois bem, aqui dá-se-nos um caso de apelido de origem topográfica. O cal acontece com farta frequênciam no nosso país, tam rico como el é em topónimos, bola secular dispersom da sua povoacóm.

Vemos como estes apelidos (Orense, Vigo, Noya, Cervantes, Baamonde, Mellid, Rábade, Ribadulla...), na maioria dos surostos perderom essa preposicóm de que indicava procedéncia. Noutros, nom.

Outras vezes, essa procedéncia nom significava precisamente nacemento. Assi, os religiosos que adoptavam o nome da localidade do convento no que professavam. Caso que nos atinge é o do galego, natural de Sárria, Frei Luís de Granada.

No suposto dos seculares, está claro, rois, que qualquer Betanzos que polo mundo circule —e bem que circulam de antigo, segundo nos dizia Seijas!— tem que ter o seu berce, mais ou menos antergo, na nossa Cidade dos Cavaleiros.

Por isso é que imos citar, para informacóm do provável leitor, alguns casos

célebres que encontrámos; e vam por orde cronológico.

Frei Domingo de Betanzos (5). Consta ser natural de Leóm e morto em Valhaholid (1549). Missionário dominico em Santo Domingo, México e Guatemala. Carteou-se co Pe. Las Casas e escreveu "Parecer".

Juan de Betanzos (8). Nado em Betanzos a começos do século, foi levado ne-no ao Peru, cadrando ali com Pizarro e casando (1542) com umha indígena de alta posiçom. Autor do primeiro catecismo em idioma quechua, deve-se-lhe, tamém, um dos primeiros tratados sobre história e tradiçons bolivianas e peruanas.

Frei Pedro Alfonso de Betanzos (8), tamém conhecido por "Fray Alonso", natural de Betanzos (fins do século XV), morreu em Chomes (na actual Costa Rica) em 1570. Exerceu de missionário franciscano em Guatemala, Nicarágua e México. Lingüista, como o seu par do Peru, devem-se-lhe vários trabalhos filológicos, assi como umha "Doctrina cristiana en lengua de Guatemala" (a dos índios cachiueles, na actual República de El Salvador).

Vemos, pois, que se trata de tres emigrantes, os tres no mesmo século XVI.

Emigrante mesmo, mais contemporâneo nosso, é o andaluz *Odón Betanzos*, natural de Rociana (Huelva), 1926, que exerce de poeta e crítico literário em Nova Iorque (USA).

Algo anterior no tempo foi *Frei José María Betanzos*, natural de Luno (Gernika-Biskaia), (1863-1948) (9), chamado o "Pai dos Pobres" em Tánger, onde este franciscano residía como vicário apostólico de Marrocos.

Será deturpacóm do mesmo vocáculo o apelido do médico, escritor e político portoriquense do século passado *Ramón E. Betances*? Nom é improvável, dada a desfiguraçom que muitos apelidos peninsulares sofrem ao serem transplantados fora. Com este Betances do XIX aconteceu o contrário que com os Betanzos do XVI: el emigrou cara a nós, para a Europa, onde houvo de morar em Paris, como exiliado político, por mor da sua lui-

ta a prol da independéncia da sua pátria.

Aí fica essa minguada relaçom dos Be-
tanços que no mundo houvo e hai: sú-
peitando que ela nom é exaustiva, valha,
simplesmente, de curiosa notícia para o

nom menos curioso leitor que tenha a
paciéncia necessária para se mergulhar
neste trabalhinho feito para o "Anuário
Brigantino", por amável invitaçom do
amigo Xosé Antón.

Na Corunha, novembro/82.

-
- (1) "Toponimia gallega y leonesa" Compostela, 1977, pág. 321.
 - (2) "Cincuentenario de Orense, 1913-1963", Tres Arroyos, 1963.
 - (3) C. Zubillaga Barrera: "Los gallegos en el Uruguay", Montevidéu, 1966.
 - (4) "Topónimos gallegos se repiten en los cinco continentes", em. "La Voz de Galicia", A Corunha, 15-Outubro-1982.
 - (5) "Enciclopedia Universal Ilustrada Europea-Americana" (pop. Espasa-gigante).
 - (6) "Gran Enciclopedia Gallega", tomo 3, pág. 245.
 - (7) Idem nota (5).
 - (8) Antonio Couceiro Freijomil: "Diccionario Bio-bibliográfico de escritores", tomo I, Compostela, 1951.
 - (9) José Luis Soto Pérez: "Un siglo de historia literaria (1862-1962)", Compostela, 1969.